


Deporte Local

Recordando un baluarte di deporte

Victor Hoek, mihor conoci como "Maestro"



ORANJESTAD (AAN)--- Awe nos ta duna honor na un persona cu den pasado a yega di ta un deportista y nos di Diario Deportivo hopi biaha nos a yega di trece esaki dilanti danki na e informacionnan y potretnan cu nos ta haya for di Sr. Mario Mateo, un persona cu semper a percura pa crea un cronica di e hechonan deportivo di nos isla y especialmente di esnan cu ela yega di conoce personalmente y cu den su tempo nan a yega di destaca of ta den noticianan deportivo.

Awe nos ta papia di Sr. Victor Hoek, conoci cariñosamente como "Maestro" kende a yega di ta un persona conoci den diferente deporte, siguiientemente nos ta hasi un

reseña di e talentoso persona aki:

Victor Hoek tabata ex hefe di Huis van Bewaring di Aruba pa hopi aña, Toy a sirbi dienst for di aña 1943 -45.

Ela yega di hunga futbol pa Newlandia y Holanda. E deportenan cu e tabata gusta hunga tabata Domino, Dam, Billiard, Softball y tambe e tabata masagista, tambe e tabata referee di AVB.

Durante su tempo den dienst, Toy a yega di practica tambe e deporte di Boxeo y tambe a hunga futbol pa Savaneta Kamp.

Na 1944 a yega di bai hunga na Corsow pa e celebracionnan di e di 25 aña di New Holland como Campeon di Corsow y Holanda como Campeon di

Aruba na aña 1943.

E hungadornan cu a bai na e celebracion tabata Marcial Klepper, Sisto Oviedo, Ismael Quandt, Jacobo Kelkboom, Hendrick Kelkboom, Emile Orman, Heminio Jacobs, Rosendo Aparicio, Ciril Orman, Victor Hoek y Ovio Orman.

Na Aña 1954, Toy a cuminsa entrena cu Holanda y Maxi Odor tabata e presidente di e team, e tempo ey nan a bai hunga contra di e team di Robin Hood di Surinam, cu a bin hunga na un torneo cu a wordo organisa pa Trappers Club, caminda nan a bin hunga 5 wega na Aruba na luna di October 1954. Dia 2 di October 1954, Trappers vs Robin Hood 2-0 pa Robin



Hood, 3 di October 1954, La Salle di Aruba vs Robin Hood 2-1 pa Robin Hood, 5 di October, Holanda vs Robin Hood 3-2 pa Holanda, 13 di October 1954 Dakota vs Robin Hood 5-0 pa Robin Hood, 16 October 1954 RCA vs Robin Hood 4-3 pa Robin Hood.

Den e partido di Holanda contra Robin Hood, e partido tabata gana pa Robin Hood pero despues ela wordo empata y despues gana, esaki tabata e unico team cu a gana e ekipo di Suriname, esta Robin Hood.

Maestro Toy Hoek su deseo a wordo cumpli como entrenador, na 1955 Holanda a participa den un torneo cu a tuma lugar na Lago Sportpark caminda Holanda a bai final contra di Aruba Jrs caminda

e wega a keda empata 2-2 pa despues pasa na tiramento di penalty di asina Holanda a bira campeon.

E hungadornan cu tabata entrena bao di Toy tabata como lo siguiente: Donald Emersz (Keeper), E. Orman, J. Franken, Peews Tromp, Toti Lopez, Chemito Orman, Tuyo Werleman, R. Bau Maduro, J. Fingal, Jossy Vos, Mario Mateo y S. Fingal.

E tabata un persona hopi streng na su trabao y cu hopi respet. Recientemente Victor "Maestro Toy" Hoek a bay sosega den brasa di Señor y nos lo keda recorde cu hopi cariño. Diario Deportivo kier a expresa nos palabranan di sincero condolencia na e famia di Maestro y a la vez un gradicimento na Sr. Mario Mateo pa su tremendo aporte.

